

**Inatsisartut aalajangiiffigisassaattut siunnersuutigarput Naalakkersuisut peqquneqassasut 2013-imi ukiakkut ataatsimiinnissamut paasiniarneqassasoq piviusunnorsinnaanersoq aningaasatigullu paasiniarneqassasoq INUILI-p ataani aalisarnermi ineriartortitsivissaq, tassani suliffissuaqarfiit ilisimatusarfiillu suleqatigalugit misissorneqassasoq aalisakkanik qalerualinnillu tunisassiat ineriartortinnissaat tunitsiviillu allanngorarnerat malillugu nalimmassarneqarnissaat. Naalakkersuisut misissuinerat nassuiaammik malitseqartariaqarpoq Inatsisartunut agguassassamik.**

(Inatsisartunut ilaasortat Knud Kristiansen aamma Siverth K. Heilmann, Atassut)

### **Akissuteqaat**

(Ilinniartitaanermut Ilisimatusarnermullu Naalakkersuisoq)

#### Siullermeerneqarnera

Siunnersuuteqartut Inatsisartuni aalajangiiffigisassatut siunnersuutigaat Naalakkersuisut peqquneqassasut aalisarnermi ineriartortitsivissamik pilersitsisinnaanissaq piviusunnorsinnaanissaatigut aningaasaqarnikkullu INUILI'p ataani pilersitsisinnaanissaq misissussagaat.

Naalakkersuisut isumaqatigaat Qitiusumik Ilinniarsiit tunngavissaqartut inuussutissarsiutini ilinniarsiit ingerlatsivigisaasa iluanni ilisimasani katersuivittut ingerlatsisuusinnaanerannik. Ilisimasat misilittakkallu ilinniarsinni pineqartuni ingerlatsiviullutillu pilersitsiviusarput suliffeqarfiit ataatsimoorussamik iluaqutissaannut atasumik qanimut attaveqarfisarnersigut.

Naalakkersuisut ilisimavaattaaq Qitiusumik Ilinniarsiit ataasiakkaat ilinniagaqarfittut ineriartortitseqqinnissamik sammiviliisutut ingerlatsisinnaanissartik kissaatigisarigaat, taamaasillutik annertusiartortumik siunnerfilimmillu inuussutissarsiutinut ilinniarsiit pineqartut inuussutissarsiutitigut ingerlatsivigisaasa iluanni ilisimasani katersuivittut ingerlatsisuusinnaalernissamut ineriartortitseqqissinnaajumallutik. Ilinniarsiit ilisimasani katersuivittut arlalippassuartigut ingerlatsisareerput, assersuutigalugulu INUILI'p nerisassat pillugit isumassarsioqatigiissitsineq septembarip qaammataani ingerlateqqammerpaa, siunertaralugu nerisassalerinerup iluani isumassarsiorlunilu siunnersuisinnaasarnissap siuarsarsinnaanissaa, inuussutissarsiutinik pineqartunik ingerlataqartut qanimut suleqatigalugit.

Naalakkersuisut tamanna tunngavigalugu isumannaarumavaat taamatut ineriartortoqarnerata Qitiusumik Ilinniarsinni siulersuisut nalinginnaasumik pingaarnersuisarnerisa ilaattut, taamatullu isumagisassatut suliassaasa ilaattut tunngavissinneqassasoq, politikikkut suliaqartunit maanaannakkut peqquseratarsinnaanissaq aarleqqutigiumanagu aqqissuussinerit nutaat aningaasaqarnikkullu pingaarnersuinerit ilinniarsiup ilinniagaqarfittut pineqartup salliutillugit suliaqarnissaanut akornutaasinnaasumik.

Naalakkersuisut matuma siuliini nassuiaatigineqartut tunngavigalugit inassutigaat Naalakkersuisut INUILI'p ataani aalisarnermi ineriartortitsivissamik pilersitsisinnaanissaq pillugu piviusunnorsinnaanissaatigut aningaasaqarnikkullu periarfissanik misissuinissamik peqquneqarnissaannik aalajangiiffigisassatut siunnersuut ilalernerneqassanngitsoq.